

HIRO,
 O te paèraa ia o to tupuna,
 O tei paè i to oe oraraa.
 O te pae atoà ia o to huaai iti
 O ta oe i vai iho mai,
 I te ao taata nei.

HIRO,
 E ioa ia no te Aito roo nui
 I te tau o te hui aito ra,
 O tei vai iho mai i te mau tapao,
 No ta na mau ohipa tui roo i haa,
 I te mana o te Atua,
 Ta te ui o teie tau e maere nei.

HIRO,
 E aito oe. E aito no te Fenua Maohi.
 To oe puai e to oe mana,
 Eere tei te aitamai e te poritita,
 Tei te aroha rà e te here
 I to oe nunaa iti.

HIRO,
 Te mau pehepehe ta oe i pehe noa,
 E poroi hinaaro faatià tena
 I to nunaaa iti e hià atu ra,
 Ia ite e ia farii faahou o na ia na,
 Ei nunaa maohi tiàturi i te Atua anaè,
 To na ora tumu e aita atu.

HIRO,
 Ua faarue mai oe i te ao taata,
 Ua reva i te ao Atua ra.
 Te poroi rà no te ohipa o ta oe i haa,
 Aita oe i taitai i to tere.
 Ua vai iho mai rà oe e na te mau aito a muri,
 E tutà tapaufifi i te reira,
 Ia tupu te ôpuaraa faaora a te Atua
 I to Na nunaa iti maohi.

HIRO,
 A reva rà. A reva i te ao Atua.
 Ei reira oe pehepehe noa ai
 I te pehe faateni i te Atua Rahu Nui,
 Tei horoà i to nunaa iti,
 Te fenua, te miti, te reva e to reira î,
 Tapao no te aroha e te here o te Atua.

HIRO. Ia ora i te haereà.



E HIRO, E AITO OE.